

signanter Embrichonem primum fuisse inter Principes, qui fundarunt monasteria pro Scotis, quia, si loquamur de monasteriis Scotorum, sive à Principibus, sive ab aliis (qui non fuerunt Principes) fundatis, primum & antiquissimum Scotorum, à Germanis fundatum, est illud monasterium Scotorum Erfordiae fundatum à Waltero de Glisberg, anno Domini 1032; fuit hic Walterus nobilis, cujus posterius hodie Comites Papenheimii, ceterum post mortem sepultus est in eadem à se fundata Ecclesia, & visitur adhuc sepulchrum. Hoc monasterium cum aliis duobus, videlicet Ratisbonensi & Herbipolensi etiamnum Scoti possidemus. Verum hujus monasterii proventus adeo tenues & exigui sunt, ut vix uni personae alendae sufficiant. Sed quis scit, quid serus vespere vheat? forsitan miseros meliora sequentur. Proximo loco succedit monasterium Scotorum Viennae, quod fundatum est ab Henrico Duce Austriae circa annum 1167. Hoc monasterium quo pacto contra omne jus & æquum Scotis ereptum fuerit, fusè in historia mea narrabo, de qua re meritò conqueritur Urbanus VIII Papa in literis suis ad Ferdinandum Secundum Imperatorem datis. Posset quidem hoc monasterium facili negotio recuperari, nisi paupertas, debita, & angustiae nos undique premerent, ita ut non habeamus redditus pro competenti aliquo personarum numero alendo in monasteriis quae jam habemus, tantum abest ut pro novis (ut ita loquar) coloniis deducendis pares simus.

*Monasterium Scotorum Erfordiae.*

*Monasterium Scotorum Viennae.*

*Monasterium Scotorum Constantiae.*

*Monasterium Scotorum Memmingae.*

Non diu post fundatum est monasterium Scotorum Constantiae ab Episcopo istius loci, cujus nomen (cum non habeam nunc ad manum libros vel scripta) mihi jam non occurrit. Hoc etiam monasterium fraude & dolo Germanorum amissum. Eodem fere tempore, hoc est, circa annum Dominicæ Incarnationis 1180, fundatum est à Welfone Sueviae Duce monasterium Scotorum Memmingae, quod Scoti usque ad tempora Lutheri possedimus; tunc autem cives Memmingani derelicta Catholica Religione, Confessionem Augustanam amplexi sunt: quapropter Monachi & alii, quibus nova illa professio displicebat, coacti sunt

inde discedere. Circa idem tempus fundatum est à nobili quodam Bavaro (cujus etiam nomen mihi excidit) monasterium Scotorum Aichstadii, vulgo Aichstat, quod distat ab urbe Ingolstadiana tribus miliaribus Germanicis. Hoc monasterium eodem, quo alia supradicta, modo amissum. Demum anno 1240, aut circiter, fundatum est à Duce Bavariae monasterium Scotorum Kelhamii, vulgo Kelhem, quod tribus tantum miliaribus Germanicis distat Ratisbona. Ceterum temporis & bellorum injuria adeo depauperatum est, ut præter domum exiguum quandam vineam, & sylvam nihil nobis hodie super sit. Hujus monasterioli administratio & regimen est penes Abbatem Scotorum Ratisbonae, qui solet vel unum è suis Scotis huic loco præficere, vel aliquem Germanum (casu quo non sint Scoti) qui tenetur solvere quotannis pensionem monasterio Ratisbonensi. His adde monasterium Scotorum Paderbornae fundatum à S. Paterno Scoto circa annum 900, quod postea incendio conflagravit. Alia etiam fuere monasteria Scotorum in Germania, de quibus omnibus prolixè agam in historia mea, cui talis titulus, Germania Christiana, sive de plantata & propagata Christiana fide in Germania per Scotos. Ibi autem edentur chronica omnium nostrorum monasteriorum, cum serie & Catalogo Abbatum uniuscujusque monasterii, cumque Privilegiis & confirmationibus Summorum Pontificum, atque Imperatorum, nec non Electorum & aliorum Principum, quae omnia tractabuntur in secundo nostro tomo; in primo autem agemus de conversione singularum Provinciarum Germaniae ad fidem Christianam.

*Monasterium Scotorum Aichstadii.*

*Monasterium Scotorum Kelhamii.*

*Monasterium Scotorum Paderbornae.*

Hæc pauca raptim, & tumultuante calamitate scripsi ego Robertus Strachanus Scotus de monte Rosarum, alias P. Bonifacius ordinis S. Benedicti, tradenda nobili & magnifico Heroi, Domino Ioanni Scott. Baroni à Scotis-Tarvett, Directori Cancellariae Regni Scotiae, Equiti Aurato & Consiliario Regio.

Vienna 20 Novemb. 1641.